



Centralna banka
BOSNE I HERCEGOVINE
Централна банка
БОСНЕ И ХЕРЦЕГОВИНЕ



Informacija o rezultatima ankete o inflacijskim očekivanjima iz septembra 2025. godine



U uslovima usporenog privrednog rasta i globalnih cjenovnih pritisaka, očekivana inflacija se u Bosni i Hercegovini i dalje nalazi u fokusu kao faktor koji utiče na donošenje ekonomskih odluka, od planiranja potrošnje do kreiranja monetarne politike. Njena kretanja mogu ukazivati na povjerenje javnosti u pogledu budućih ekonomskih uslova, ali i uticati na donošenje odluka u privatnom i javnom sektoru. Centralna banka Bosne i Hercegovine (CBBiH) kvartalno provodi Anketu o inflatornim očekivanjima, u skladu s rastućim interesom domaćih i stranih institucija. Učesnici ankete su i dalje predstavnici finansijskog sektora – komercijalne banke i osiguravajuća društva, a cilj ankete je da pruži vrijedne uvide u percepciju i očekivanja različitih aktera u ekonomiji.

Rezultati ankete provedene u septembru 2025. godine ukazuju na blage oscilacije očekivane inflacije za posmatrani period. Za tekuću 2025. godinu ista iznosi 3,5%, što je apsolutni rast od 0,1 procentni poen u odnosu na junski krug ispitivanja. Očekivanja za 2026. godinu su zabilježila smanjenje sa 3,2% u junu na 3,1% u ovom krugu anketiranja.

Važno je naglasiti da smanjenje inflatornih očekivanja ne znači pad cijena proizvoda i usluga, već usporavanje rasta očekivanih inflatornih pritisaka. U praktičnom smislu, to olakšava usklađivanje ponude i potražnje, te doprinosi efikasnijem donošenju ekonomskih politika. Posljedično, jačaju očekivanja u pogledu rasta raspoloživog dohotka, što je često povezano s većim realnim rastom plata. Za privredu, stabilna inflacijska očekivanja znače veću predvidivost u poslovanju, investiranju i strateškom planiranju. U takvom okruženju, ukupna ekonomska klima postaje pogodnija za održiv rast i razvoj. Nastavak provođenja ankete o očekivanoj inflaciji je od ključnog značaja jer omogućava pravovremeno praćenje promjena u percepciji ekonomskih aktera, što pomaže donosiocima politika efikasnije reakcije i održavanje makroekonomske stabilnosti.

